

Penduduk luar bandar lebih bahagia, kurang tekanan

KUALA LUMPUR 12 Mei - Penduduk luar bandar menikmati kehidupan yang lebih sejahtera berbanding masyarakat di bandar, menurut Kajian Kesejahteraan Masyarakat Malaysia 2014/2015.

Kajian yang diketuai oleh Felo Penyelidik Utama Institut Pengajian Sains Sosial, Universiti Putra Malaysia (UPM), Prof. Emeritus Datuk Dr. Sulaiman Md. Yassin dengan kerjasama Yayasan Basmi Kemiskinan (YBK) itu menunjukkan penduduk luar bandar mencatat indeks kesejahteraan sebanyak 3.87 daripada 5.00, lebih tinggi berbanding di kawasan bandar iaitu hanya 3.60.

Sulaiman berkata, tahap kesejahteraan yang lebih tinggi dalam kalangan masyarakat di luar bandar disumbangkan oleh cara hidup secara individu dan hubungan sosial.

"Kebanyakan penduduk luar bandar menjalani kehidupan lebih tenang dan gembira berbanding masyarakat bandar yang berdepan dengan pelbagai tekanan termasuk di tempat kerja dan laluan trafik se-sak."

"Kajian tersebut juga menunjukkan hubungan sosial penduduk luar bandar dengan keluarga dan masyarakat setempat lebih mesra berbanding orang bandar yang mempunyai corak kehidupan tersendiri," katanya.



SULAIMAN MD. YASSIN

Beliau berkata demikian kepada pemberita selepas menghadiri majlis perasmian Seminar Antara-bangsa Tahap Sejahtera Rakyat oleh Menteri Kesejahteraan Bandar, Perumahan dan Kerajaan Tempatan, Datuk Abdul Rahman Dahlan di Bangi dekat sini hari ini.

Yang turut hadir, Pengerusi YBK, Datuk Zainal Abidin Sakom dan Timbalan Naib Canselor (Hal Ehwal Pelajar dan Alumni) UPM, Prof. Datuk Dr. Mohammad Shatar Sabran.

Mengulas lanjut, Sulaiman berkata, kajian terhadap 800 responden di seluruh negara berusia 15 tahun ke atas menggunakan teknik persampelan itu dipecahkan kepada tiga bahagian utama iaitu kesihatan, sosial dan fizikal.

"Setiap tiga bahagian itu mempunyai 12 dimensi yang merangkumi semua aspek berkaitan. Setiap dimensi tersebut pula mempunyai pecahan lima hingga lapan pernyataan melibatkan aspek yang lebih mendalam mengenai ketiga-tiga bahagian berkenaan," ujarnya.

Sulaiman turut menyatakan, kajian sulung itu mendapat sokongan penuh daripada YBK dan pihaknya diberi kepercayaan untuk menghasilkan lebih banyak kajian berhubung kesejahteraan rakyat Malaysia dalam tempoh 10 tahun akan datang.